

*«Ўзбекнефтгаз» МХК
акциядорларнинг йиллик умумий
йиғилишининг 04.11.2016й. 2-сонли
баённомасига 4-илова*

**«ТАСДИҚЛАНГАН»
«Ўзбекнефтгаз» МХК
акциядорларнинг йиллик умумий
йиғилишининг 2016 йил 4 ноябрдаги
қарори билан**

**«ЎЗБЕКНЕФТГАЗ» МИЛЛИЙ ХОЛДИНГ КОМПАНИЯСИ
АКЦИЯДОРЛИК ЖАМИЯТИ АКЦИЯДОРЛАРИНИНГ
УМУМИЙ ЙИҒИЛИШИ ТЎҒРИСИДАГИ
НИЗОМ**

(янги тахрирда)

.

Тошкент - 2016 йил

I-бўлим.

Умумий қоидалар

1.1. Мазкур низом Ўзбекистон Республикаси «Акциядорлик жамиятлари ва акциядорларнинг ҳуқуқларини ҳимоя қилиш тўғрисида»ги қонунига, Акциядорлик жамиятлари фаолиятининг самарадорлигини ошириш ва корпоратив бошқарув тизимини такомиллаштириш комиссияси йиғилишининг баённомаси билан (11.02.2016й. № 02-02/1-187) тасдиқланган Корпоратив бошқарув кодексининг тавсиялари, «Ўзбекнефтгаз» МХК (матн бўйича «Компания») уставига мувофиқ ишлаб чиқилган ва Компания акциядорларининг умумий йиғилиши мавқеини, ишини белгилайди, уни ўтказиш ва қарорлар қабул қилинишини тартибга солади.

1.2. Компания ҳар йили акциядорларнинг умумий йиғилишини ўтказиши шарт.

1.3. Акциядорларнинг йиллик умумий йиғилиши молия йили тугаганидан кейин олти ойдан кечиктирмай ўтказилади. Одатда акциядорларнинг йиллик умумий йиғилиши июнь ойида ўтказилади. Акциядорларнинг йиллик умумий йиғилишида Компаниянинг Бошқарувчилар кенгашини ва тафтиш комиссиясини сайлаш тўғрисидаги, Компаниянинг Бошқарув раиси билан тузилган шартноманинг муддатини узайтириш, уни қайта тузиш ёки бекор қилиш мумкинлиги ҳақидаги масалалар ҳал этилади, шунингдек қонун ҳужжатлари ва мазкур уставга мувофиқ Компаниянинг йиллик ҳисоботи, Компания Бошқаруви ва Бошқарувчилар кенгашининг Компанияни ривожлантириш стратегиясига эришиш бўйича кўрилатган чора-тадбирлар тўғрисидаги ҳисоботлари ва бошқа ҳужжатлари кўриб чиқилади.

1.4. Акциядорларнинг йиллик умумий йиғилишидан ташқари ўтказиладиган умумий йиғилишлари навбатдан ташқари йиғилишлардир.

1.5. Акциядорларнинг умумий йиғилишини ўтказиш санаси ва тартиби, йиғилиш ўтказилиши ҳақида акциядорларга хабар бериш тартиби, акциядорларнинг умумий йиғилишини ўтказишга тайёргарлик вақтида акциядорларга бериладиган материалларнинг (ахборотнинг) рўйхати Компаниянинг Бошқарувчилар кенгаши томонидан белгиланади.

II-бўлим.

Акциядорлар умумий йиғилишининг ваколатлари ва қарорларни қабул қилиш

2.1. Акциядорлар умумий йиғилишининг ваколат доирасига қуйидагилар киради:

2.1.1. Компания уставига ўзгартириш ва қўшимчалар киритиш ёки Компаниянинг янги таҳрирдаги уставини тасдиқлаш, Бошқарувчилар кенгаши қарори билан Компания уставига Компаниянинг устав фондиди (устав капиталини) кўпайтириш ҳамда Компаниянинг эълон қилинган акциялари сонини камайитириш билан боғлиқ ўзгартириш ва қўшимчалар киритиш бундан мустасно;

2.1.2. Компанияни қайта ташкил этиш;

2.1.3. Компанияни тугатиш, тугатувчини (тугатиш комиссиясини) тайинлаш ҳамда оралик ва якуний тугатиш балансларини тасдиқлаш;

2.1.4. Компания Бошқарувчилар кенгашининг сон таркибини белгилаш, уларнинг аъзоларини сайлаш ва аъзоларнинг ваколатларини муддатидан илгари тугатиш;

2.1.5. эълон қилинган акцияларнинг энг кўп миқдорини белгилаш;

2.1.6. Компаниянинг устав фондини (устав капиталини) камайтириш;

2.1.7. ўз акцияларини олиш;

2.1.8. Компаниянинг ташкилий тузилмасини тасдиқлаш, Бошқарув раисини сайлаш (тайинлаш) ва уни ваколатларини муддатидан илгари тугатиш. Шунингдек Компания Бошқарувчилар кенгаши Компаниянинг Бошқарув раиси билан тузилган шартномани, агар у Компания уставини қўпол тарзда бузса ёки унинг ҳаракатлари (ҳаракатсизлиги) туфайли Компанияга зарар етказилган бўлса, муддатидан илгари тугатиш (бекор қилиш) ҳуқуқига эга;

2.1.9. Компания тафтиш комиссиясининг аъзоларини сайлаш ва уларнинг ваколатларини муддатидан илгари тугатиш, шунингдек тафтиш комиссияси тўғрисидаги низомни тасдиқлаш;

2.1.10. Компаниянинг йиллик ҳисоботини, шунингдек Компания фаолиятининг асосий йўналишлари ва мақсадидан келиб чиққан ҳолда Компанияни ўрта муддатга ва узоқ муддатга ривожлантиришнинг аниқ муддатлари белгиланган стратегиясини тасдиқлаш. Зарур ҳолларда Компаниянинг тасдиқланган ривожлантириш стратегияларига ўзгартириш ва қўшимчалар киритиш;

2.1.11. Компаниянинг фойдаси ва зарарларини тақсимлаш;

2.1.12. Компания Бошқарувчилар кенгашининг ва тафтиш комиссиясининг ўз ваколат доирасига кирадиган масалалар юзасидан, шу жумладан Компанияни бошқаришга доир қонун ҳужжатларида белгиланган талабларга риоя этилиши юзасидан Компания Бошқарувчилар кенгашининг ҳисоботларини ва тафтиш комиссиясининг хулосаларини эшитиш;

2.1.13. имтиёзли ҳуқуқни қўлламаслик тўғрисида Ўзбекистон Республикаси «Акциядорлик жамиятлари ва акциядорларнинг ҳуқуқларини ҳимоя қилиш тўғрисида»ги Қонунининг 35-моддасида ва Компания уставида назарда тутилган қарорни қабул қилиш;

2.1.14. акциядорлар умумий йиғилишининг регламентини тасдиқлаш;

2.1.15. акцияларни майдалаш ва йириклаштириш;

2.1.16. Компаниянинг Бошқарув аъзоларига тўланадиган ҳақ ва (ёки) компенсацияларни энг юқори миқдорларини белгилаш;

2.1.17. Ўзбекистон Республикаси «Акциядорлик жамиятлари ва акциядорларнинг ҳуқуқларини ҳимоя қилиш тўғрисида»ги қонунининг 8 ва 9-бобларида назарда тутилган ҳолларда Компания томонидан битимлар тузиш тўғрисида қарор қабул қилиш;

2.1.18. Компаниянинг кундалик хўжалик фаолияти билан боғлиқ битимларни аниқлаш;

2.1.19. хайрия (хомийлик) ёки беғараз ёрдамни энг кўп миқдорларини белгилаш;

2.1.20. мустақил профессионал ташкилотлар – маслахатчиларни жалб қилган ҳолда бизнес жараёнлар ва лойихалар Компаниянинг ривожланиш мақсадларига мувофиқлиги хар йиллик таҳлилинини ўтказиш бўйича қарор қабул қилиш;

2.1.21. Ички назорат, Дивиденд сиёсати, Манфаатлар қарама-қаршилиги вақтида ҳаракат қилиш тартиби тўғрисидаги низомларни тасдиқлаш;

2.1.22. Компания уставига ва қонун ҳужжатларига мувофиқ бошқа масалаларни ҳал этиш.

2.2. Акциядорлар умумий йиғилишининг ваколат доирасига киритилган масалалар Компаниянинг Бошқарувига ҳал қилиши учун берилиши мумкин эмас.

2.3. Акциядорлар умумий йиғилишининг ваколат доирасига киритилган масалалар Компаниянинг Бошқарувчилар кенгаши ҳал қилиши учун берилиши мумкин эмас, қонун ҳужжатлари ва Компания уставида назарда тутилган ҳолатлар бундан мустасно.

2.4. Ушбу Низомнинг 2.1.1., 2.1.2., 2.1.3., 2.1.5., 2.1.12. ва 2.1.17. кичик бандларида кўрсатилган масалалар бўйича қарор акциядорлар умумий йиғилиши томонидан акциядорларнинг умумий йиғилишида иштирок этаётган овоз берувчи акцияларнинг эгалари бўлган акциядорларнинг тўртдан уч қисмидан иборат кўпчилик (малакали кўпчилик) овози билан қабул қилинади.

Солиққа оид ёки давлат олдигаги бошқа қарздорлик ҳисобига Компания устав фондидаги (устав капиталидаги) давлат улушини шакллантириш ёки ошириш тўғрисидаги қарор Компания акциядорлари умумий йиғилиши томонидан Компаниянинг жойлаштирилган овоз берувчи акцияларининг камида учдан икки қисми эгалари бўлган акциядорларнинг (давлатдан ташқари) розилиги мавжуд бўлган тақдирда, акциядорларнинг оддий кўпчилик овози билан қабул қилинади.

2.5. Овозга қўйилган қолган масалалар бўйича акциядорлар умумий йиғилишининг қарорлари, агар қонун ҳужжатларида ва Компаниянинг уставида бошқача қоида белгиланмаган бўлса, Компаниянинг овоз берувчи акциялари эгалари бўлган, йиғилишда иштирок этаётган акциядорларнинг кўпчилик (оддий кўпчилик) овози билан қабул қилинади.

2.6. Акциядорларнинг умумий йиғилишида овоз бериш «Компаниянинг овоз берувчи битта акцияси — битта овоз» принципи бўйича амалга оширилади, Компаниянинг Бошқарувчилар кенгаши аъзоларини сайлаш бўйича кумулятив овоз беришни ўтказиш ҳоллари бундан мустасно.

2.7. Акциядорларнинг умумий йиғилишида кун тартиби масалалари бўйича овоз бериш овоз бериш бюллетенлари орқали амалга оширилади.

2.8. Акциядор ва унинг вакилининг ёзма талабига асосан Компания у томонидан тўлдирилган овоз бериш бюллетени нусхасини тақдим этиши шарт.

2.9. Акциядорларнинг умумий йиғилишида қатнашиш имкони бўлмаган акциядор, шу жумладан видеоконференцалоқа орқали, акциядорларнинг умумий йиғилиши ўтказилиш санасига қадар 1 иш кунидан кечиктирмай Компаниянинг электрон манзилига у томонидан тўлдирилган ва унинг электрон рақамли имзоси билан тасдиқланган бюллетеннинг электрон вариантини юборишга ҳақли.

Акциядорлар умумий йиғилишида видеоконференцалоқа орқали қатнашаётган акциядор у томонидан тўлдирилган ва унинг электрон рақамли имзоси билан тасдиқланган бюллетеннинг электрон вариантини акциядорлар умумий йиғилиши тугаганидан сўнг 1 иш куни давомида Компаниянинг электрон манзилига юбориши шарт.

Бунда Компания бюллетеннинг электрон вариантдан фойдаланиш учун акциядор олдиндан қонун ҳужжатларида белгиланган талабларга мувофиқ

электрон рақамли имзони ҳаққонийлигинитекшириш имкониятини таъминлаши шарт.

Овоз бериш бюллетени акциядор томонидан ўз вақтида тақдим этилмаган холда бундай бюллетенлар бўйича овозлар ҳисобга олинмайди.

2.10. Компаниянинг акциядорлари, шу жумладан миноритар акциядорлар, овоз беришда ўзларининг умумий фикрини (позициясини) шакллантириш учун акциядорлик битишувлар тузишга ҳақли.

2.11. Акциялар билан тақдим қилинадиган ҳуқуқларни амалга ошириш ва (ёки) акцияларга бўлган ҳуқуқларни амалга ошириш хусусиятлар бўйича шартнома акциядорлик битишув деб этироф этилади.

2.12. Акциядорлик битишувни тузиш, бекор қилиш ва шартларига риоя қилиш, шунингдек ушбу битишув бўйича томонларнинг ҳуқуқлари, мажбуриятлари ва муносабатлари Ўзбекистон Республикаси қонун ҳужжатлари билан тартибга солинади.

III-бўлим.

Акциядорлар умумий йиғилишда қатнашиш ҳуқуқи.

Акциядорларни ва уларнинг ваколатли вакилларини рўйхатдан ўтказиш

3.1. Акциядорларнинг умумий йиғилишида иштирок этиш ҳуқуқига акциядорларнинг умумий йиғилиши ўтказиладиган санадан уч иш куни олдин шакллантирилган Компания акциядорларининг реестрида қайд этилган акциядорлар эга бўлади.

Компания акциядорининг талабига кўра акциядорга у акциядорларнинг умумий йиғилишини ўтказиш учун шакллантирилган Компания акциядорларининг реестрига киритилганлиги тўғрисида ахборот тақдим этиши шарт.

3.2. Компания акциядорларининг реестрига ўзгартиш ва қўшимчалар киритилишига йўл қўйилмайди, мазкур реестр шакллантирилган санада унга киритилмай қолган шахсларнинг бузилган ҳуқуқлари тикланган ёки реестрни шакллантиришда йўл қўйилган хатолар тузатилган ҳоллар бундан мустасно.

3.3. Акциядорларнинг умумий йиғилишида Компания акциядорлари реестрида қайд этилган акциядорлар, уларнинг ваколатли вакиллари, Компания аудитори, Бошқарувчилар кенгаши, Бошқарув ва тафтиш комиссияси аъзолари ҳозир бўлиш ҳуқуқига эгадир.

Компания Бошқарувчилар кенгаши, тафтиш комиссияси аъзолигига ва Компаниянинг Бошқарув раиси лавозимига номзодлар ўзларининг номзодлари кўриб чиқиладиганда акциядорлар умумий йиғилишида қатнашишлари мумкин.

3.4. Умумий йиғилишда қатнашиш учун акциядорлар ёки уларнинг ваколатли вакиллари йиғилиш ўтказилиши тўғрисидаги билдиришномада кўрсатилган жой ва вақт бўйича белгиланган тартибда рўйхатдан ўтишлари керак.

Акциядорларнинг умумий йиғилишида акциядор шахсан қатнашиш имкони бўлмаган тақдирда ушбу акциядор акциядорларнинг умумий йиғилиши ўтказилиши тўғрисидаги билдиришномани олгандан сўнг видеоконференцалоқа тартибда акциядорлар умумий йиғилишида қатнашиш ва электрон почта орқали овоз бериш (электрон рақамли имзо билан тасдиқланган) ҳақида Компанияга талабнома юбориши мумкин.

3.5. Агар қонунчиликда узгача қоида белгиланган бўлмаса акциядорнинг, шу жумлада акциядорлик битишув тузган акциядорларнинг вакили акциядорларнинг умумий йиғилишида ёзма шаклда тузилган ишончнома асосида иш юритади. Овоз беришга доир ишончномада ваколат берган ва вакил қилинган шахс тўғрисидаги маълумотлар (исми-шарифи ёки номи, яшаш жойи ёки жойлашган ери, паспортига оид маълумотлар) бўлиши лозим. Жисмоний шахс номидан берилган овоз беришга доир ишончнома нотариал тартибда тасдиқланган бўлиши керак. Юридик шахс номидан овоз беришга доир ишончнома унинг раҳбарининг имзоси ва ушбу юридик шахснинг муҳри билан (муҳр мавжуд бўлган тақдирда) тасдиқланган ҳолда берилади.

3.6. Агар Компаниянинг акцияси бир нечта шахснинг умумий улушли мулкда бўлса, акциядорларнинг умумий йиғилишида овоз бериш ваколатлари уларнинг хоҳишига кўра умумий улушли мулк иштирокчиларидан бири ёки уларнинг умумий вакили томонидан амалга оширилади. Кўрсатиб ўтилган ҳар бир шахснинг ваколатлари тегишли тарзда расмийлаштирилган бўлиши керак.

3.7. Умумий йиғилишда қатнашиш учун келган жисмоний шахслар бўлган акциядорларни рўйхатдан ўтказиш паспорт ёки акциядорнинг шахсини тасдиқловчи бошқа ҳужжат кўрсатилгач, вакилга нисбатан эса нотариал тартибда тасдиқланган ишончнома кўрсатилгач амалга оширилади.

3.8. Юридик шахс – Компания акциядорининг раҳбари акциядорларнинг умумий йиғилишдаги ўз ваколатларини лавозимга тайинлаш тўғрисидаги ҳуқуқий ҳужжат ҳамда шахсни тасдиқловчи ҳужжат асосида амалга оширади.

3.9. Юридик шахс – Компания акциядорининг вакили акциядорлар умумий йиғилишида ушбу юридик шахс раҳбарининг имзоси ёки бунга таъсис ҳужжатлари билан вакил қилинган бошқа шахснинг имзоси ва юридик шахснинг муҳри билан тасдиқланган унинг номига берилган ишончнома мавжуд бўлган тақдирда қатнашиши мумкин.

3.10. Акциядорларнинг умумий йиғилишида қатнашиш учун акциядорларни рўйхатдан ўтказиш Компания акциядорлари реестрига биноан биринчи иловада келтирилган шакл бўйича қайд этиш рўйхати тузилади. Қайд этиш рўйхати жузланган, тартиб рақами қўйилган, ип ўтказиб тикилган ва Компания муҳри билан тасдиқланган бўлиши керак.

3.11. Умумий йиғилишни ўтказишда акциядорлар (уларнинг вакиллари) қайд этиш рўйхатига имзо чекадилар ва Компания акциядорлари реестри маълумотлари бўйича белгиланган ҳар бир акциядорнинг овоз берувчи акциялари сонидан келиб чиқиб овоз бериш бюллетенини оладилар (бюллетен намунаси иккинчи иловада келтирилган).

Мазкур Низомнинг 2.9. бандида белгиланган ҳолатларда акциядорларни рўйхатдан ўтказиш санок комиссияси томонидан қайд этиш рўйхатига тегишли ёзувларни киритиш йўли билан амалга оширилади.

3.12. Агар йиғилиш қатнашчиси бир ёки бир неча акциядорнинг манфаатларини ифодалашга ишончнома тақдим этса, у ҳолда унга у ифодалаётган акциядор (акциядорлар) учун овоз беришга бюллетен берилади, қайд этиш рўйхатида эса у ифодалаётган акциядорнинг фамилияси қаршисига «_____та (сони) овоз берувчи акциялар бўйича «_____» да берилган ишончнома бўйича»

деган ёзув қайд этилади ҳамда вакилнинг фамилияси, исми, отасининг исми кўрсатилади.

IV-бўлим.

Акциядорларнинг йиллик умумий йиғилишини ўтказишга тайёргарлик кўриш

4.1. Акциядорларнинг умумий йиғилишини ўтказишга тайёргарлик кўрилаётганда Бошқарувчилар кенгаши қуйидагиларни белгилайди:

4.1.1. умумий йиғилиш ўтказиладиган сана, вақт ва жойни;

4.1.2. умумий йиғилишнинг кун тартибини;

4.1.3. умумий йиғилиш ўтказиш учун жамият акциядорларининг реестри шакллантириладиган санани;

4.1.4. умумий йиғилиш ўтказилиши ҳақида акциядорларга ва давлат вакилига хабар қилиш тартибини;

4.1.5. умумий йиғилишни ўтказишга тайёргарлик кўрилаётганда акциядорларга ва давлат вакилига тақдим этиладиган ахборот (материаллар) рўйхатини;

4.1.6. овоз бериш бюллетенининг шакли ва матнини.

4.2. Акциядорларнинг умумий йиғилишини ўтказиш тўғрисидаги хабар акциядорларнинг умумий йиғилиши ўтказиладиган санадан камида етти кундан кечиктирмай, лекин узоғи билан ўттиз кун олдин Компаниянинг расмий веб-сайтида, оммавий ахборот воситаларида эълон қилинади, шунингдек акциядорларга электрон почта орқали юборилади.

Компания давлат вакилини акциядорларнинг умумий йиғилиши ўтказиладиган санадан камида етти кун олдин ёзма шаклда хабардор қилиши шарт.

4.3. Акциядорларнинг умумий йиғилишини ўтказиш тўғрисидаги хабарда қуйидагилар кўрсатилиши керак:

4.3.1. Компаниянинг номи, жойлашган ери (почта манзили) ва электрон почта манзили;

4.3.2. умумий йиғилиш ўтказиладиган сана, вақт ва жой;

4.3.3. Компания акциядорларининг реестри шакллантириладиган сана;

4.3.4. умумий йиғилиш кун тартибига киритилган масалалар;

4.3.5. умумий йиғилишни ўтказишга тайёргарлик кўрилаётганда акциядорларга ва давлат вакилига тақдим этилиши лозим бўлган ахборот (материаллар) билан акциядорларни ва давлат вакилини таништириш тартиби.

4.4. Акциядорларнинг умумий йиғилишини ўтказишга тайёргарлик кўрилаётганда акциядорларга ва давлат вакилига тақдим этилиши лозим бўлган ахборотга (материалларга) Компаниянинг йиллик ҳисоботи, Компаниянинг йиллик молия-хўжалик фаолиятини текшириш натижалари юзасидан жамият тафтиш комиссиясининг (тафтишчисининг) ва аудиторлик ташкилотининг хулосаси, Компаниянинг Бошқарувчилар кенгашининг Бошқарув раиси билан тузилган шартноманинг амал қилиш муддатини узайтириш, шартномани қайта тузиш ёки бекор қилиш мумкинлиги тўғрисидаги хулосаси, шунингдек Компаниянинг Бошқарувчилар кенгаши ҳамда тафтиш комиссияси аъзолигига (тафтишчилигига)

номзодлар тўғрисидаги маълумотлар, Компаниянинг уставига киритилган ўзгартиш ва қўшимчалар лойиҳаси ёки жамиятнинг янги таҳрирдаги устави лойиҳаси, шунингдек Бошқарувчилар кенгашининг акциядорлар умумий йиғилиши кун тартиби бўйича муносабати киради.

Умумий йиғилишини ўтказишга тайёргарлик кўриладиганда акциядорларга тақдим этилиши мажбурий бўлган қўшимча ахборотнинг (материалларнинг) рўйхати қимматли қоғозлар бозорини тартибга солиш бўйича ваколатли давлат органи томонидан белгиланиши мумкин.

4.5. Компания овоз берувчи акцияларининг ҳаммаси бўлиб камида бир фоизга эгалик қилувчи акциядорлар (акциядор) Компаниянинг молия йили тугаганидан кейин тўқсон кундан кечиктирмай акциядорларнинг йиллик умумий йиғилиши кун тартибига масалалар фойдани тақсимлаш бўйича таклифлар киритишга ҳамда Компания Бошқарувчилар кенгаши ва тафтиш комиссиясига бу органнинг миқдор таркибидан ошмайдиган тарзда номзодлар кўрсатишга ҳақли.

4.6. Акциядорлар умумий йиғилишининг кун тартибига масала уни қўйиш сабаблари, масалани киритаётган акциядорларнинг (акциядорнинг) исми-шарифи (номи), уларга тегишли акцияларнинг сони ва тури кўрсатилган ҳолда ёзма шаклда киритилади.

Компания Бошқарувчилар кенгашига ва тафтиш комиссиясига номзодлар кўрсатиш тўғрисида таклифлар киритилганда, шу жумладан ўзини ўзи номзод қилиб кўрсатилган тақдирда номзоднинг исми-шарифи, унга тегишли акцияларнинг сони ва тури (агар номзод Компания акциядори бўлса), шунингдек номзодни кўрсатаётган акциядорларнинг исми-шарифи (номи), уларга тегишли акцияларнинг сони ва тури кўрсатилади.

4.7. Компаниянинг Бошқарувчилар кенгаши тушган таклифларни кўриб чиқиши ҳамда мазкур низомнинг 4.5. бандида белгиланган муддат тугаганидан сўнг ўн кундан кечиктирмай уларни акциядорларнинг умумий йиғилиши кун тартибига киритиш тўғрисида ёки мазкур кун тартибига киритишни рад этиш ҳақида қарор қабул қилиши шарт.

4.8. Акциядорлар (акциядор) томонидан киритилган масала акциядорлар умумий йиғилишининг кун тартибига, худди шунингдек кўрсатилган номзодлар Компаниянинг Бошқарувчилар кенгашига ва тафтиш комиссиясига сайлов бўйича овоз бериш учун номзодлар рўйхатига киритилиши керак, қуйидаги ҳоллар бундан мустасно:

4.8.1. ушбу низомнинг 4.5. бандида белгиланган муддатга акциядорлар (акциядор) томонидан риоя этилмаган бўлса;

4.8.2. акциядорлар (акциядор) Компаниянинг ушбу низомнинг 4.5. бандида назарда тутилган миқдордаги овоз берувчи акцияларининг эгаси бўлмаса;

4.8.3. агар ушбу Низомнинг 4.6. бандиданазарда тутилган маълумотлар тўлиқ бўлмаса;

4.8.4. таклифлар қонун ҳужжатлари талабларига мувофиқ бўлмаса.

4.9. Акциядорлар (акциядор) Компания Бошқарувчилар кенгаши ва тафтиш комиссиясига ўзлари кўрсатган номзодлар рўйхатига акциядорларнинг йиллик умумий йиғилиши ўтказилиши тўғрисидаги хабар эълон қилинган санадан эътиборан уч иш кунидан кечиктирмай ўзгартишлар киритишга ҳақли.

4.10. Компания Бошқарувчилар кенгашининг масалани акциядорлар умумий йиғилишининг кун тартибига ёки номзодни Компания Бошқарувчилар кенгашига ва тафтиш комиссиясига сайлов бўйича овоз бериш учун номзодлар рўйхатига киритишни рад этиш тўғрисидаги асослантирилган қарори масалани киритган ёки таклиф тақдим этган акциядорларга (акциядорга) қарор қабул қилинган кундан эътиборан уч иш кунидан кечиктирмай юборилади.

4.11. Компания Бошқарувчилар кенгашининг масалани акциядорлар умумий йиғилишининг кун тартибига ёки номзодни Компания Бошқарувчилар кенгашига ва тафтиш комиссиясига сайлов бўйича овоз бериш учун номзодлар рўйхатига киритишни рад этиш тўғрисидаги қарори устидан судга шикоят қилиниши мумкин.

V-бўлим.

Акциядорларнинг навбатдан ташқари умумий йиғилишини ўтказишга тайёргарлик кўриш

5.1. Акциядорларнинг навбатдан ташқари умумий йиғилиши Компания Бошқарувчилар кенгашининг қарорига кўра:

5.1.1. унинг ўз ташаббуси асосида;

5.1.2. тафтиш комиссиясининг (тафтишчининг) ёзма талаби;

5.1.3. ёзма талаб тақдим этилган санада Компаниянинг овоз берувчи акцияларининг камида беш фоизига эгаллик қилувчи акциядорнинг (акциядорларнинг) ёзма талаби асосида ўтказилади.

5.2. Акциядорларнинг навбатдан ташқари умумий йиғилишини чақириш акциядорларнинг навбатдан ташқари умумий йиғилишини ўтказиш ҳақида ёзма талаб тақдим этилган кундан эътиборан ўттиз кундан кечиктирмай Компаниянинг Бошқарувчилар кенгаши томонидан амалга оширилади.

5.3. Акциядорларнинг навбатдан ташқари умумий йиғилишини ўтказиш тўғрисидаги талабда йиғилиш кун тартибига киритилиши керак бўлган масалалар уларни киритиш сабаблари кўрсатилган ҳолда таърифланган бўлиши керак.

5.4. Компаниянинг Бошқарувчилар кенгаши Компания тафтиш комиссиясининг ёки Компаниянинг овоз берувчи акцияларининг камида беш фоизига эгаллик қилувчи акциядорнинг (акциядорларнинг) талабига кўра чақириладиган акциядорларнинг навбатдан ташқари умумий йиғилиши кун тартибигаги масалаларнинг таърифига ўзгартишлар киритишга ҳақли эмас.

5.5. Акциядорларнинг навбатдан ташқари умумий йиғилишини чақириш тўғрисидаги талаб акциядордан (акциядорлардан) чиққан тақдирда, бу талабда умумий йиғилишни чақиришни талаб қилаётган акциядорнинг (акциядорларнинг) исми-шарифи (номи), унга тегишли акцияларнинг сони, тури кўрсатилган бўлиши лозим.

5.6. Акциядорларнинг навбатдан ташқари умумий йиғилишини чақириш тўғрисидаги талаб акциядорларнинг навбатдан ташқари умумий йиғилишини чақиришни талаб қилган шахс (шахслар) томонидан имзоланади.

5.7. Компаниянинг тафтиш комиссияси ёки Компаниянинг овоз берувчи акцияларининг камида беш фоизига эгаллик қилувчи акциядор (акциядорлар) акциядорларнинг навбатдан ташқари умумий йиғилишини чақириш тўғрисида талаб тақдим этган санадан эътиборан ўн кун ичида Компания Бошқарувчилар

кенгаши акциядорларнинг навбатдан ташқари умумий йиғилишини чақириш тўғрисида ёки йиғилишни чақиришни рад этиш ҳақида қарор қабул қилиши керак.

5.8. Компания тафтиш комиссиясининг (тафтишчисининг) ёки Компаниянинг овоз берувчи акцияларининг камида беш фоизига эгалик қилувчи акциядорнинг (акциядорларнинг) талабига кўра акциядорларнинг навбатдан ташқари умумий йиғилишини чақиришни рад этиш тўғрисидаги қарор қуйидаги ҳолларда қабул қилиниши мумкин, агар:

5.8.1. талаб тақдим этилган санада акциядорларнинг навбатдан ташқари умумий йиғилишини чақиришни талаб қилаётган акциядор (акциядорлар) овоз берувчи акцияларининг беш фоизига эга бўлмаса;

5.8.2. кун тартибига киритиш учун таклиф этилган масалалардан бирортаси ҳам акциядорлар умумий йиғилишининг ваколат доирасига кирмаса;

5.8.3. кун тартибига киритиш учун таклиф этилган масала қонун ҳужжатлари талабларига мувофиқ бўлмаса.

5.9. Компания Бошқарувчилар кенгашининг акциядорларнинг навбатдан ташқари умумий йиғилишини чақириш тўғрисидаги қарори ёки бундай йиғилишни чақиришни рад этиш ҳақидаги асослантирилган қарори йиғилиш чақиришни талаб қилган шахсларга қарор қабул қилинган пайтдан эътиборан уч иш кунидан кечиктирмай юборилади.

5.10. Компания Бошқарувчилар кенгашининг акциядорларнинг навбатдан ташқари умумий йиғилишини чақиришни рад этиш тўғрисидаги қарори устидан судга шикоят қилиниши мумкин.

5.11. Компания Бошқарувчилар кенгаши ушбу Низомнинг 5.2. бандида белгиланган муддат ичида акциядорларнинг навбатдан ташқари умумий йиғилишини чақириш тўғрисида қарор қабул қилмаган тақдирда ёки уни чақиришни рад этиш ҳақида қарор қабул қилган тақдирда, акциядорларнинг навбатдан ташқари умумий йиғилиши уни чақиришни талаб қилган шахслар томонидан чақирилиши мумкин.

Бундай ҳолларда акциядорларнинг умумий йиғилишига тайёргарлик кўриш ва уни ўтказиш билан боғлиқ харажатларнинг ўрни акциядорлар умумий йиғилишининг қарорига кўра жамиятнинг маблағлари ҳисобидан қопланиши мумкин.

VI-бўлим.

Акциядорлар умумий йиғилиши кворуми

6.1. Агар акциядорларнинг умумий йиғилишида иштирок этиш учун рўйхатдан ўтказиш тугалланган пайтда Компаниянинг жойлаштирилган овоз берувчи акцияларининг жами эллик фоизидан кўпроқ овозига эга бўлган акциядорлар (уларнинг вакиллари) рўйхатдан ўтган бўлса, акциядорларнинг умумий йиғилиши ваколатли (кворумга эга) бўлади.

6.2. Кворум ҳисоблашда мазкур Низомнинг 2.9. бандида белгиланган тартибга мувофиқ акциядорларнинг умумий йиғилишида қатнашаётган акциядорларнинг овоз берувчи акциялари ҳам ҳисобга олинади.

6.3. Агар акциядорларнинг умумий йиғилиши бошланишининг белгиланган вақтига кворум бўлмаса акциядорларнинг такрорий умумий йиғилишини ўтказиш

санаси эълон қилинади. Акциядорларнинг такрорий умумий йиғилишини ўтказишда кун тартибини ўзгартиришга йўл қўйилмайди.

6.4. Агар акциядорларнинг ўтказилмай қолган йиғилиши ўрнига чақирилган такрорий умумий йиғилишида иштирок этиш учун рўйхатдан ўтказиш тугалланган пайтда Компаниянинг жойлаштирилган овоз берувчи акцияларининг жами қирқ фоизидан кўпроқ овозига эга бўлган акциядорлар (уларнинг вакиллари) рўйхатдан ўтган бўлса, акциядорларнинг такрорий умумий йиғилиши ваколатли бўлади.

6.5. Агар такрорий умумий йиғилишда кворум бўлмаса, бунда акциядорларнинг ташшабуси билан чақирилган йиғилиш амалга ошмаган деб ҳисобланади ва бошқа чақирилмайди, Бошқарувчилар кенгаши ёки тафтиш комиссияси ташшабуси билан чақирилган йиғилиш эса кворум таъминланмаганча чақирилади.

6.6. Кворум бўлмаганлиги сабабли акциядорларнинг умумий йиғилишини ўтказиш санаси йигирма кундан кам муддатга кўчирилган тақдирда, умумий йиғилишда иштирок этиш ҳуқуқига эга бўлган акциядорлар ўтказилмай қолган умумий йиғилишда иштирок этиш ҳуқуқига эга бўлган акциядорларнинг реестрига мувофиқ аниқланади.

VII-бўлим.

Акциядорлар умумий йиғилишнинг ишчи органлари

7.1. Қуйидагилар умумий йиғилиш ишчи органлари ҳисобланади: раёсат, санок комиссияси, котиб (котибият).

7.2. Акциядорларнинг умумий йиғилишини Компания Бошқарувчилар кенгашининг раиси, у узрли сабабларга кўра бўлмаган тақдирда эса, Компания Бошқарувчилар кенгашининг аъзоларидан бири олиб боради.

7.3. Акциядорлар умумий йиғилиши раиси йиғилиш раёсатига бошчилик қилади, йиғилиш олиб борилишини таъминлайди ва ўз вазифаларини бажариш учун зарур бўлган барча ваколатларга эга бўлади. Бунда акциядорларнинг умумий йиғилиши раёсати таркибига Компаниянинг вакили лавозимига кўра киради.

7.4. Умумий йиғилиш раиси йиғилиш ўтишига раҳбарлик қилади, ишчи органлари ишини мувофиқлаштиради, масалаларни муҳокама қилиш тартибини белгилайди, маърузачиларнинг нутқ сўзлашлари вақтини чегаралайди, йиғилишни олиб бориш ва овоз бериш бўйича тушунтиришлар беради, залда тартиб ўрнатилишини назорат қилади. Умумий йиғилиш раиси акциядорларнинг умумий йиғилишини аудио-видео тасмага ёзиб олиш ва Интернет тармоғида трансляция қилиш масалаларни руҳсат бериш (санкция бериш) ҳуқуқига эга.

7.5. Овозларни санаб чиқиш, акциядорларнинг умумий йиғилишида иштирок этиши учун акциядорларни рўйхатга олиш, шунингдек овоз бериш бюллетенларини тарқатиш учун Компаниянинг Бошқарувчилар кенгаши томонидан санок комиссияси тузилиб, унинг аъзолари сони ва шахсий таркиби акциядорларнинг умумий йиғилиши томонидан тасдиқланади.

7.6. Санок комиссиясининг таркиби камида уч кишидан иборат бўлиши керак. Санок комиссияси таркибига Компания Бошқарувчилар кенгашининг аъзолари, тафтиш комиссиясининг аъзолари (тафтишчиси), Компания Бошқаруви аъзолари, ишончли бошқарувчи, шунингдек ана шу лавозимларга номзоди кўрсатилган шахслар кириши мумкин эмас.

7.7. Бунда санок комиссиясига амалий ёрдам кўрсатиш ёки унинг функцияларини бажариш учун Компания Бошқарувчилар кенгашининг қарорига асосан мустақил экспертлар (инвестицион маслахатчилар ва бошқа қимматли қўғозлар бозорининг профессионал иштирокчилари) жалб қилиниши мумкин.

7.8. Овоз берилганида овоз берувчи қайси масала бўйича эҳтимол тутилган овоз бериш вариантларидан фақат биттасини қолдирган бўлса, ўша масала бўйича берилган овозлар ҳисобга олинади. Мазкур талабни бузган ҳолда тўлдирилган овоз бериш бюллетенлари ҳақиқий эмас деб топилади ва улардаги масалалар бўйича берилган овозлар ҳисобга олинмайди.

7.9. Агар овоз бериш бюллетенида овозга қўйилган бир нечта масала кўрсатилган бўлса, бир ёки бир нечта масалага нисбатан мазкур Низомнинг 7.8. бандида кўрсатилган талабга риоя этилмаганлиги бюллетеннинг умуман ҳақиқий эмас деб топилишига сабаб бўлмайди.

7.10. Санок комиссияси унга юклатилган вазифаларни бажариш масаласида мустақил иш юритувчи йиғилишнинг доимий фаолият кўрсатадиган ишчи органи ҳисобланади ва Бошқарувчилар кенгаши таклифи асосида акциядорлар умумий йиғилиши томонидан сайланади.

7.11. Санок комиссияси ваколатларининг муддати у акциядорлар умумий йиғилиши томонидан сайланган пайтдан бошлаб акциядорларнинг тегишли йиғилиши (йиллик ёки навбатдан ташқари) томонидан санок комиссиясининг янги таркиби сайланиши (ёки қайта сайланиши) пайтигача амал қилади.

7.12. Акциядорлар умумий йиғилишида санок комиссияси қуйидаги функцияларини амалга оширади:

7.12.1. умумий йиғилишда қатнашиш учун акциядорларни (уларнинг вакиллари) рўйхатдан ўтказди;

7.12.2. ишончномалар ва улар томонидан бериладиган ҳуқуқлар ҳисобини юритади;

7.12.3. овоз бериш бюллетенларини ва умумий йиғилишнинг бошқа материалларини тарқатади;

7.12.4. акциядорлар умумий йиғилиши қворуми мавжудлигини аниқлайди;

7.12.5. акциядорлар (уларнинг вакиллари) томонидан умумий йиғилишда овоз бериш ҳуқуқини амалга ошириш муносабати билан пайдо бўлувчи масалаларни тушунтиради;

7.12.6. овоз беришга қўйилаётган масалалар бўйича овоз бериш тартибини тушунтиради;

7.12.7. овоз беришнинг белгиланган тартибини ва акциядорларнинг овоз беришда қатнашиши ҳуқуқини таъминлайди;

7.12.8. овозларни санайди ва овоз бериш яқунларини чиқаради;

7.12.9. овоз бериш яқунлари тўғрисида баённома тузади;

7.12.10. овоз бериш бюллетенларини архивга топширади.

7.13. Умумий йиғилиш котибиятининг сон ва шахсий таркиби акциядорлар умумий йиғилиши томонидан тасдиқланади.

7.14. Умумий йиғилиш котибияти:

7.14.1. умумий йиғилишнинг боришини баёнга қайд этиб боради;

7.14.2. ёзма буюртманомалар бўйича йиғилиш кун тартиби масалаларини муҳокама қилишда қатнашиш истагини билдирувчилар рўйхатини олиб боради;

7.14.3. мазкур Низомда назарда тутилган ҳолларда видеоконференцалоқани ёзиб олиншини таъминлайди;

7.14.4. умумий йиғилиш тамом бўлгандан сўнг ўнқундан кечиктирмай акциядорлар умумий йиғилиши баёнини икки нусхада тузади.

VIII-бўлим.

Акциядорлар умумий йиғилишни олиб бориш тартиби

8.1. Акциядорлар умумий йиғилишини олиб бориш тартиби (регламент) акциядорларнинг ҳар бир умумий йиғилишида мазкур низомга мувофиқ тасдиқланади.

8.2. Акциядорлар умумий йиғилишнинг раиси умумий йиғилиш санок комиссиясини, раёсатини ва котибиятни (котибни) сайлашни таклиф этади.

8.3. Акциядорлар умумий йиғилишининг ишчи органлар таркиби оддий кўпчилик овоз билан тасдиқланади.

8.4. Умумий йиғилишни олиб бориш тартиби йиғилишнинг бошланиши ва тахминан тамом бўлиш вақтини, нутқлар қанча давом этиши ва танаффусларни, кун тартибидаги масалаларнинг изчиллигини, кун тартиби масалалари бўйича маърузачиларнинг фамилиялари ва лавозимларини, овоз беришни амалга ошириш ва унинг натижаларини эълон қилиш тартибини назарда тутади.

8.5. Акциядорлар умумий йиғилишида муҳокама қилинаётган масала бўйича йиғилишнинг ҳар бир қатнашчиси белгиланган вақт доирасида сўзга чиқиш ҳуқуқига эга. Ушбу ҳуқуқни таъминлаш акциядорлар умумий йиғилиши раисининг зиммасида бўлади.

8.6. Кун тартибидаги масалаларни муҳокама қилишда қатнашиш истагини билдирганлар умумий йиғилиш котибиятига муҳокама қилинадиган масалани кўрсатган ҳолда ёзма буюртманома беришлари лозим.

8.7. Кун тартибининг барча масалалари муҳокама қилингандан кейин раис акциядорлар умумий йиғилишини ёпиқ деб эълон қилади.

IX-бўлим.

Акциядорлар умумий йиғилишининг баённомаси

9.1. Акциядорлар умумий йиғилишида баённома юритилади.

9.2. Акциядорлар умумий йиғилишининг баённомасида:

- акциядорларнинг умумий йиғилиши ўтказилган сана, вақт ва жой;
- Компаниянинг овоз берувчи акцияларига эгалик қилувчи акциядорлар эга бўлган овозларнинг умумий сони;
- умумий йиғилишда иштирок этган акциядорлар эга бўлган овозларнинг сони;
- умумий йиғилишнинг раиси (раёсати) ва котиби, йиғилиш кун тартиби кўрсатилади.
- маърузаларнинг асосий мазмуни, овозга қўйилган масалалар ҳамда улар юзасидан ўтказилган овоз бериш яқунлари, йиғилиш қабул қилган қарорлар.

Акциядорларнинг умумий йиғилиши видеоконференцалоқа орқали ўтказилган ҳолларда йиғилиш баённомасига ушбу йиғилишнинг видео ёзуви шартли равишда илова қилинади.

9.3. Акциядорлар умумий йиғилишининг баённомаси акциядорларнинг умумий йиғилиши ёпилганидан кейин ўн кундан кечиктирмай икки нусхада тузилади. Ҳар иккала нусха ҳам умумий йиғилишда раислик қилувчи ва умумий йиғилиш котиби томонидан имзоланади.

9.4. Саноқ комиссияси баёни йиғилишнинг махсус қарори билан тасдиқланмайди, балки маълумот учун қабул қилинади ҳамда умумий йиғилиш баённомасига қўшиб қўйилиши керак.

9.5. Овоз бериш яқунлари тўғрисида баённома тузилганидан ва акциядорлар умумий йиғилишининг баённомаси имзоланганидан кейин овоз бериш бюллетенлари саноқ комиссияси томонидан муҳрланади ҳамда сақлаб қўйиш учун Компаниянинг архивига топширилади.

Х-бўлим.

Акциядорлар умумий йиғилиши қарорларини бажариш

10.1. Акциядорларнинг умумий йиғилиши томонидан қабул қилинган қарорлар, шунингдек овоз бериш яқунлари акциядорлар эътиборига:

- акциядорлар умумий йиғилиши тугаганидан сўнг эълон қилиш;
- акциядорлар умумий йиғилиш баённомаси тузилган санадан икки иш куни давомида муҳим факт тўғрисидаги маълумотларни ошкор қилиш йуллари билан етказилади.

Агар Компания акциялари фонд биржасининг листингига киритилган бўлса Компания фонд биржасининг расмий веб-сайтида тегишли ахборотни эълон қилиши шарт.

10.2. Компания Бошқаруви акциядорлар умумий йиғилишининг қарорлари бажарилишини ташкиллаштиради.

10.3. Акциядорлар умумий йиғилиши қарорлари бажарилиши устидан назорат қилишни, башарти йиғилиш қарориди ўзгача ҳол қайд этилмаган ва баёнда акс этирилмаган бўлса, Компаниянинг Бошқарувчилар кенгаши амалга оширади.

10.4. Акциядорлар умумий йиғилишининг қарорлари умумий йиғилишда ҳозир бўлган, шунингдек ҳозир бўлмаган барча акциядорлар томонидан, уларга тегишли ва қонунчиликка зид бўлмаган қисми бўйича бажарилиши мажбурийдир.

ХI-бўлим.

Яқуний қоидалар

11.1. Мазкур Низом акциядорлар умумий йиғилиши томонидан тасдиқланган кундан этиборан кучга киради.

11.2. Агар мазкур Низомни бирон бир қоидаси ўз кучини йўқотган бўлса, бу қоида бошқа қоидаларни тўхтатиш учун сабаб бўлмайди.

11.3. Агар Ўзбекистон Республикасининг қонунчилик ҳужжатлари ёхуд Компания уставиди мазкур Низомда назарда тутилганидан бошқача қоидалар белгиланган бўлса, Ўзбекистон Республикасининг амалдаги қонунчилик ҳужжатлари ва Компания устави қоидалари қўлланилади.

*«Ўзбекнефтгаз» МХК акциядорларининг умумий
йиғилиши тўғрисида»ги Низомга
I - илова*

«Ўзбекнефтгаз» Миллий холдинг компанияси акциядорлик жамиятининг 20__ йил “__” ____
соат __: __ да ўтказилган акциядорлар йиллик (навбатдан ташқари) умумий йиғилишининг

ҚАЙД ҚИЛИШ РЎЙХАТИ

№ № т/р	Акциядорнинг Ф.И.Ш. ёки номи	Овоз берувчи акциялар сони	Акциядор имзоси	(Акциядор вакили қатнашганда тўлдирилади)				
				Акциядор вакилининг Ф.И.Ш.	Ишончнома рақами	Ишончнома берилган сана	Овоз берувчи акциялар сони	Вакилнинг имзоси
1	2	3	4	5	6	7	8	9

Жами _____ дона овоз берувчи акцияларга эга бўлган йиғилиш қатнашчиларнинг рўйхатга олинган сони _____ киши.

Йиғилиш кворуми (жами овоз берувчи акциялар сонига нисбатан фоизда) _____ %.

Санок комиссия аъзолари: _____ Ф.И.Ш.
(имзо)
_____ Ф.И.Ш.
(имзо)
_____ Ф.И.Ш.
(имзо)

*«Ўзбекнефтгаз» МХК акциядорларининг
умумий йиғилиши тўғрисида»ги Низомига
2-илова*

«Ўзбекнефтгаз» Миллий холдинг компанияси акциядорлик жамиятининг 20__
йил «__» _____да, соат __:__да қуйидаги манзил бўйича:
_____да бўлиб ўтаётган акциядорларнинг йиллик
(навбатдан ташқари) умумий йиғилишида _____ дона овоз берувчи акцияга эга
_____нинг
(юридик шахс акциядорнинг тўлиқ номи ёки жисмоний шахс акциядорнинг Ф.И.Ш.)

_____ - сонли **БЮЛЛЕТЕНИ** *

Кун тартибидаги масалалар бўйича овоз беришда фақат овоз бериш вариантларидан «ёқлайман», «қаршиман» ёки «бетарафман» биттасини танланг (вариантларни танлаш усули: X, √ ёки тегишли устунга овозлар сонини ёзиб қуйинг).

№	Овоз беришга қўйилган масалалар	ёқлайман	қаршиман	бетарафман
1				
2				
3				

Бошқарувчилар кенгашини сайлаш юзасидан кун тартибидаги масала бўйича овозлар сони (овоз берувчи акциялар сони Компаниянинг Бошқарувчилар кенгашига сайланиши лозим бўлган шахслар сонига кўпайтирилади) - _____ . Сиз шу тариқа олган овозларни битта номзодга тўлиқ беришга ёки икки ва ундан ортиқ номзодлар ўртасида тақсимлашга ҳақлисиз.

№	Овоз беришга қўйилган масалалар		Бошқарувчилар кенгаши таркибига сайланаётган номзодга берилган овозлар сони
	Бошқарувчилар кенгашининг таркибига сайлансин:		
	Номзоднинг Ф.И.Ш.	Номзод ҳақида қисқа маълумот	
1			
2			
3			

ФИШ _____

_____ (имзо)

Овоз бериш бюллетени акциядор (унинг вакили) томонидан имзоланиши лозим.

* Акциядорни қайд қилиш рўйхатидаги тартиб рақами ёзилади.